



原子

13
1176
2



1176
卷 2



原子卷下

舊名三一
省餘言

敬事第九

淡路

原公逸飛卿

著

國以政為事人以業為事故政令所設一國之興廢
於此乎見焉事業所從一身之存亡於此乎有焉不
可不慎哉夫天下有一人無事者邪士農工商四者
各有事而為天下之用其無事而生者為游民周禮
大司徒無職事者出夫家之征所以防游民也蓋人
逸居無事則淫思生淫思生而奇巧出奇巧出而齊

民趨齊民趨而本業廢世有鬪智巧射機利者居致
千金富侔於國君富者人人所俱欲也此其廢本趨
末之所由而害於風俗莫大焉夫風俗之美惡在上
位者之爲歟移風易俗教化之所先也故其陵夷日
衰弊者執政者之罪也不修闡之則雖朝士大夫智
爲利闇慕市井之風躬廢其事惟利之務詩云如賈
三陪君子是識故上自公卿百執事下至庶人專心
致志夙夜從其事懼懼如不逮此謂之敬事也其敬
事者何遑及佗事乎是故上下敬事百姓安百姓安

而天下治矣其慢事者雖從之無成功古不事事者
如漢高祖及陳平豈游手浮食之謂乎其繇咸陽宰
於里社以我可事者不在於此故少頃從之然不專
心一如不相與者又如晉諸賢在朝不任事亦非廢
事也惟知成功不可庶幾而不竭心極才已否則胡
有立於人之朝而無事者乎世儒闇於大較謾弛無
檢者高之而鄙佗卑卑從事者自不事其事且歷詆
有司之短波及其君竟喪父祖之世祿絕其祀者不
思之甚也第令其有才賤議貴者罪也孔子曰不在

其位不謀其政者誠人敬其事也世有處士者上不立乎人之朝下不在商賈之間而無事者也故其人非惇慤彊毅用心有恒者則不爲利所鈎趨邪僻者不爲不多矣其有技而食者不復爲無事者其中有道藝者鬻詩書利束脩身無君子之行傲然語仁義雖可羞之甚猶賢於夫君機變之巧而不耻之專事姦富者遠矣若夫繩身卑議黃緣侯門所奸之國必盡享廩粟而猶不廢徃教役役不能自息者是何心哉亦名與利耳雖人有志能不慚孫子嚴乎

尊賢第十

尊賢克讓人之善行也然其人非有恭謙之實則不克自抑損下人也其官尊志溢自以爲賢者慚折節於賤者行戾自縱唯恐人有予違者難諷已於賢者也賢者不必在於貴苟尊賢則不得不以身下之也今夫人王之貴孤立於億兆之上憂勞天下一日萬機明有所不照焉智有所不及焉而所恃者群臣耳群臣非其人則聖人其猶病諸書云允迪厥德謨明彌諧又云聽德惟聰故臧武仲曰在上位者洒濯其

心壹以待人我聞之堯有九佐舜有七友禹有五丞
湯有三輔雖聰明睿知之主猶資於人以自輔書云
能自得師者王謂人莫己若者亡故明主擇賢臣所
以自爲而爲人臣者薦賢與立所以爲忠也詩云嗟
我懷人寘彼周行若知其賢而不敬敬而遠之則何
以親賢爲孔子曰臧武仲其竊位者與知桺下惠之
賢而不與立也旣賢之則任之以重任之以重則優
之以禮優之以禮非以身敬之則不親此之謂人主
尊賢也傳云將求於人則先下之禮之善物凡臨大

事苟有所矜智爲之替矣猶善奕者就局或誤其道
不自知傍觀者能知之故爲己耳目者衆則身不陷
於艱難也是以人願有賢師友者將聞其所不自聞
知其所不自知也子路人語之以有過則說古之人
志於道者無自賢之行不亦美乎夫人之大滿也狎
賢者易其言雖君子之厚哉不屑告之以善書云無
自廣以狹人匹夫匹婦不獲自盡孟子曰訑訑之聲
音顏色距人於千里之外可不誠哉夫君子常敬人
故讓而資人不肖者侮人故驕而自怙於此明者益

明殄者益殄賢不肖所以分也賢者亦以不賢於不
己知者乎則病乎非有父子之親非有朋友之義豈
不得已乎是故尊賢自輔者非躬自執禮而有誠則
不為賢者親也不為賢者親則不能自知其過而悛
之也不能自知其過而悛之則日新之德不積也日
新之德不積則愚不肖之人耳愚不肖之人君子鄙
之故尊賢克讓人之善行也

汜愛第十一

師之所教以友輔之故尊師親友古之教也豫九四

曰大有得勿疑朋盍簪若夫曰切切偲偲焉曰忠告
善道焉曰輔仁焉者皆以相教訓為道也是以不得
其人而友之則無相教訓之益不唯無相教訓之益
而損於己不可不擇焉也孔子曰無友不如己者故
欲有益於己則必從賢於己者友之從賢於己者友
之而其不如己者之不容則不如己者與誰友故孔
子曰汜愛眾而親仁且也其不如己者亦不必無益
矣孔子曰三人行必有我師焉擇其善者而從之其
不善者而改之老子曰善人者不善人之師不善人

原一 卷一
者善人之資不貴其師不愛其資雖智大迷孟軻曰
中也養不中才也養不才如中也棄不中才也棄不
才則賢不肖相去不能以寸夫然故非汜愛而更相
爲師友則何相輔之有不唯相輔之道爲然又可以
知人也覲然面目邈如紀人於越人何以視人如見
其肺肝乎人曰賢而賢之人曰不賢而不賢之無自
知之之鑒而進退人猶瞽者依相危哉夫朋友相得
而親也私情相語焉貨財相通焉忠愛之情固有過
於骨肉者雖然君子有絜矩之道孔子曰所求於朋

友先施之蓋責諸己不求諸人相爲謀而忠言而信
乃能相與爲友矣今人相逐爲友者惟爲遊戲飲食
耳一日之宴杯酒爲歡輒相呼爲知己非中心好之
徒爲賞會強笑語孔子曰君子不以色親人情疏而
貌親在小人則穿窬之盜也與此輩卒然臨利害而
其相棄也如未嘗相識者是猶博有梟也便則食否
則止至若朝唱同袍之義夕爲賀首之讎者此皆由
其交不慎始擇人也且朋友之間非有蔑孳毫末之
親并信與義泯弃之則行路之人耳况無恭敬之心

一時情好相媒黷為常，忽挾睚眦之忿，相與有郅復
奚怪？詩云：民之失德，乾餱以愆。蓋自禮不講，人日薄，
與浮華推移，忠信為魯，刻佞為有，才賣交者，黨與眾
亢義者，孤立悲夫。傳曰：父母在則不許友以死，則父
母已亾，相許以死可知也。朋友之義亦大哉。若夫取
舍相同者為黨，其不同者則擯，却不能容，固非君子
之事也。為勢利匿情，與人交者，無所復比數矣。

節儉第十二

有生者必有養也，飢而食焉，寒而衣焉，二者不可相

無者也。若夫極耳目所好，與心志所樂，而為能養我
生，則無復有紀極矣。聖人有教節之，而不滯從其欲，
此之謂禮也。書云：欲敗度，縱敗禮，以速戾于厥躬。林
放問禮之本，孔子曰：禮與其奢也，寧儉。故人之行，莫
善於儉，莫不善於奢。儉者樂而常足，奢者憂而常不
足。其好奢侈者，誇一時之華麗，而無遠慮。一旦資產
俱盡，身蹈坎蹇之患，不顧父母之養，兄弟妻子離湯，
豈人情哉？雖人主亦然。凡國將衰也，無不自民之窮
而衰，民之窮也，無不自上好奢而窮，不可不慎也。蓋

居
卷下
七
人之情莫不好貴而惡賤好富而惡貧孰棄其所好而甘心其所惡乎夫芻豢稻粱之旨孰與糟糠藜藿之麤綿纊狐貉之厚孰與澣衣布苴之寒宮室帷帳之麗孰與蓬戶桑樞之庳奇戲俳優之觀孰與擾攘紛紜之煩佳冶窈窕之美孰與椎髻荆釵之醜管絃謳歌之樂孰與屏間匡坐之寂然自其足者道之其寒也足以覆體其麤也足以充飢其庳也足以容膝其煩也足以理生其醜也足以伉儷其寂也足以養志莊周曰知足則富自其不足者道之有龍肉熊掌

之味而未嘗焉有黼黻文章之貴而未服焉有章華漸臺之高而未居焉有馳騁田獵之壯而未觀焉有毛嬙西施之艷而未見焉有桑林咸池之調而未聞焉故人之行莫善於儉莫不善於奢若夫儉過中則在上者有逼下之誅在下者有吝嗇之嫌吝嗇者犯義自利苞苴不通慶弔不致其刻薄無所不至也禮尚往來此輩焉知禮乎今夫以禮爲閑緣閑而外者爲奢緣閑而內者爲儉儉而不至溢則無所失也禮不下庶人則從其有無亦可也爵祿之家有格今格

猶古禮歟。孔子曰：管仲鏹簋朱紘，山節藻梲，賢大夫也，而難爲上也；晏平仲祀其先人，豚肩不揜豆，賢大夫也，而難爲下也。君子上不僭上，下不偪下，是故極耳目所好，與心志所樂，而無制度者，君子得志而不爲也。

自知第十三

學者宜自知也。不自知而信，則臨事多過失矣。凡學士，恒寓目於經史，經史所載，不深思之，乃謂徒如是而已矣。孔子曰：多聞闕疑，慎言其餘，則寡尤；多見闕

殆，慎行其餘，則寡悔。又曰：君子於其所不知，蓋闕如也。是道其自知自信也。孔子使漆彫開仕，對曰：吾斯之未能信。子說：古人自信而後從事，不以殆僥倖者，可以見焉。孔子曰：居則曰不吾知也，如或知爾，則何以哉？子路冉有公西華各言其所能，曰：千乘之國攝乎大國之間，曰：方六七十，如五六十，曰：宗廟會同，端肖甫，皆自知而以其所信告之，故孔子亦信之。如使今學者答之，乃必曰：我得志則比及三年，可鎮撫社稷，懷柔諸侯，四夷重譯，欵關來貢，高則高矣，辨則辨

矣唯是浮辭勦說徒驚愚戇之聞而已非通人達才者所注意也雖然吾以此不概天下之士海內之廣人民之衆豈無其人乎先哲之微言可以爲鑑也孔子曰有德者必有言有言者不必有德老子曰知者不言言者不知是以人之多言吾未能信焉蓋伊尹呂尚之倫當其揮鋤於有莘氏之野投竿於渭水之濱若將自終焉諸葛武侯耕於南陽自比管仲樂毅而不求聞達於諸侯夫然故能處師保相將之貴而功烈顯於當時聲名光於無窮矣夫應龍之神在汚

澤之中爲獮獺所侮不敢抗之故怙其才者深自藏而須其知己者時動矣是以人之有才而自見者賤行也賤行之人君子不齒焉故其自誇者適足以自遇卑賤耳古之人有自比先賢者而未聞聖人自處者也其比先賢者是有其可度幾之才也而人亦爲信然子貢曰一言以爲知一言以爲不知言不可不慎也孟子曰人之易其言也無責耳矣陳平宰里中社分肉甚均父老善之平曰使平得宰天下亦如此肉矣後果如其言也裨補沛公定天下誅諸呂安劉

氏其勲勞於漢室與周召畢榮爭烈則可謂不怍其
 言也今學者室中不拊庭內蕪穢人或問之乃曰安
 事一室亦可發一大笑耳苟無其實而高尚其言學
 者之疾也孔子曰其言之不怍則為之也難又曰先
 行其言而後從之學者其記之唯要其寡言則雖有
 失之然不多矣

揚名第十四
 孔子曰君子疾沒世而名不稱焉蓋其教人所以先
 名者非唯謂其名謂其所以名者歟名不虛立其無

實行而名則所謂聞也孟子曰聲聞過情君子耻之
 奚以為教乎故孔子曰不患人不己知求為可知也
 又曰揚名於後世以顯父母是其為教可知而已矣
 繇名勵其行行成而人知之人知之而名可揚矣故
 曰盛名之下無虛士叔孫豹曰大上有立德其次有
 立功其次有立言魯有先大夫曰臧文仲既沒其言
 立其是之謂死而不朽夫德與功與言不湮滅於後
 世其人不賢而能之乎語曰人貌榮名有既乎是聖
 人教人所以先名也否則身後之餘名誠不潤泉下

之骨於吾何有。莊子曰：名者實之賓也。其斯之謂乎。奕世載德，不忝前人。古今共所爲美也。已無可繼於祖考之名，則無顯父母之孝。且其爲後者，亦無識而則之，述而稱之者。揚震曰：使後稱清白，吏之子孫是其遺子孫以榮名也。先民有言：其父折薪，其子不克負荷。蓋譏其不能繼祖考也。故君子曰：乾乾克己，勵行非爲名高，恐辱其先也。而名亦隨之。故名之不顯，士之耻也。而名之不衷，亦耻也。今之汲汲於名者，爲利達而已。爲名云乎，人皆高之。爲利云乎，人皆鄙之。

是故有陽爲爲名，而陰鈎利者。巧言令色，自欺不疑。譎詐無耻，其不爲鄉原者無幾也。若夫抗顏誇於不己知者，好詆訛其類，而自游揚者，其於賢者也側行。卑拜而見恭謙之義，退乃誹之不容口。是其薄德駁行，蓋夫猶知非之，而况君子乎。故志士仁人，惡視之不比人。其過門而不入，顧幸之而不知者，見其辯論籍籍，以爲賢。一犬吠影，百犬吠聲，其徒相傳稱譽之。在彼必聞，在此必聞，因爲奸高門之階，梯遂失聖人名教之義，自以爲得謀。雖然，一時虛名，非可囊載長。

利也。譬之無源之水，其涸也可舉足而涸耳。苟徇名而為利，自緼豈烈。丈夫之為乎，蓋正其行，不謀其名，潔其名，不謀其利，則庶幾哉。

知命第十五

知處世之難而處其難也，易知處世之易而處其易也，難其可易者而難其可難者，而易此世所以難處也。獨知其有命而安所遭遇，守死善道者，其人非有弘毅勁直之性，何能處其難而如其易乎。凡天地間有一物無命數者乎，雖草木瓦石之無情，不免時有

敗成其成，也不能不成其敗，也不能不敗而況於人乎。死生榮辱窮達貧富，畢有命而不可以勇悍智力冀幸也。雖然不為胡成，不索何獲。故孔子曰：吾其為東周乎。我豈匏瓜也哉。又曰：雖執鞭之士，我亦為之。夫為之而不可為者，無分於我也。無分於我者，非覬覦之所能得矣。蓋極人之知而不可如之何，此謂命也。盡人之功而不可如之何，此謂數也。孟子曰：知命者，不立於巖牆之下。其知命處於其難者，雖勞而無憂，僥幸處於其易者，雖逸而有懼。何者，為之有禮得

之有義而後長不喪之如不禮不義而爲之苟得者
一跌亡身凡人莫得於勞劬而不失於安逸是所以
處難之易處易之難也子夏曰死生有命富貴在天
天與命鈞數也數者人所不可如之何也而天聖人
所畏敬也其敬之即敬天所以命我也詩云胡不相
畏不畏于天然則與其偷易寧處難而守常哉孔子
曰不知命無以爲君子也子思曰君子居易以俟命
蓋志於道者期身修君子行而已矣其黠者乃曰君
子則我豈敢而行其小慧自逞於名利笑夫小心猶

介拘於學不由徑者其巧拙雖懸絕哉於斯二者何
爲愈唯君子者乎能知之士志於道而爲衆所挪揄
二三其行者不足爲士也故介然獨立從其所好孔
子曰不怨天不尤人下學而上達知我者其天乎故
學者宜知命也知命樂天不憂不懼其復何求

原子卷下終

原于卷下 殊長不覺之如不禮不義而為之也
 一誠心身凡人其得於學而而不失於學也所以
 為之也 勿疑易之難也 予是日死生有命 則天
 大矣 命也 教者人所不可知之何也 而天與人
 善宜 賦命 亦賦命 樂天不憂 其憂何來
 子曰不惑天不亦人不學而士教 映者其天乎 幼
 三三其行 善不 只 漢士 亦姑不 然 立 其 說 亦
 誠 愈 且 昔 子 善 乎 漢 映 文 士 志 允 義 而 亦 來 其 德 餘
 不 既 亦 學 不 由 野 善 其 以 林 鏡 謝 師 姑 允 漢 二 善 回

致

余讀原于之書而手不能
 釋也其所編撰辭質而
 旨義簡而要最者補於
 名教比之今世得賤曲執云
 者不常位年之糠西敷矣

故不佞嘉加之不已將上之木與
 高天垂時諸君戮力而刻之
 原子嘆曰苟見取乎同志則
 何必藏箴鹿皮中為乎
 安永戊戌秋
 薩州侍醫河村宗澹識

藏板目錄

東都書肆藻雅堂

舟木嘉助

江戸日本橋平松町

大史華句	明本翻刻 三冊	東江先生和文章	艸書	至知編	西郊先生著 一冊
西遊紀行	熊塔台州著 二冊	同 禪林役牌	楷書	四溟陳人詩集	三冊
經義折衷	金我先生著 一冊	同 書則	同	效華集	年賀ハ詩ヲ諸名家ニ乞テア 一冊
經義緒言	同作 一冊	同 尺牘帖	諸體	画談雞肋	高陽先生著 三冊
易學辨義	同作 一冊	學則	徂來先生墨跡 石摺	觀藝首譚比考	同作 一冊
匡正錄	同作 一冊	無冤錄	唐本和解 二冊	蘭亭帖	子昂行書 石摺
金我先生文集	七冊	周易五卦之圖	復軒著 一冊	宮詞百首	後藤先生著 一冊
狂齋先生原子	二冊	難經古義	加藤俊文著 二冊	來青軒詩稿	長州岡先生著 二冊

扇卦

寫字便用

一收摺

青樓美人合

繪本春情画

八冊

祇借部類

皇月平砂
言点白考

一冊

祇借部類

皇月平砂輯

五冊

祇借部類

米叔著

一冊

詩箋

唐紙

華樣

品々

卦本

和紙
或白本

品々

昌陽

安永七年戊戌春正月

江戸書肆藻雅堂發行

須原屋市兵衛

同 嘉助

